

ጳውሎስ ኤፌሶን አሳሰ ፃፊዳ ኪታ ገደ ቆፋ

ጳውሎስ ኤፌሶን አሳሰ ፃፊዳ ኪታይ ሃራፕካ ካሴቴዲ ኢዚ ሎዔል ፃሊዛይ “ፆሳ ሼኔይ ፖሌታናይ ሳሎኒኔ ሳዓን ዲዛ ማዴቴታቴ ወሪካ ኢሲፊ ኢሲ ኪርሰቶሳ ጎዳቴላ ጋርሰ አጲዛ ዋዴይ ጋኪሺና” (1:10) ገዛ ቆፋ ቦላ። ቃሴካ ጎዳ ዩሱስ ኪርሰቶሳ ኢሲፊቴላን አሳ ዜሬል ወሪካ ኢሲኖ ገዳና ማላ ሃይሳ ገታ ቆፋ ኦሶን ፔይሻና ማላ ፆሳ ዴሬዛ ቆፕሲዛዛ።

ኤፌሶን ኪታን ኮይሮ ኪፊሌዛ ፃፊዚ ኢሲፊቴላ ገሽ ዶሚዲ አይፊ ዮፆዛ አሲዲ ፆሳ አዋይ ዴሬዛ ዋሰቲ ዶሪዳኮ፣ ባ ናዛ ዩሱስ ኪርሰቶሳ ባጋራ ኢሰቲ ባ ናጋራፔ ማርቴላ ዶሚዲ ዋኒ አቲዳኮኔ ፆሳ ገታ ሂዶታ ቃላይ ዪሎ አያና ባጋራ ዋኒ ቆንጨዳኮ ኤሪሴሰ። ናምዓንላ ኪፊሌዛን ቃሴ ፃፊዚ ናባቢዛይቲ ኢሲፊቴላ ዴፆን ኪርሰቶሳን ኢሰታሰ ዲዛ ኢሲፊቴላይ ቱሙ ገዳና ማላ ኢሰቲ ዋኒ ዋኒ ዴዓናኮኔ ኢሰታ ቆፕሲሰ።

አሳይ ኪርሰቶሳን ዲዛ ኢሲፊቴላን አይ ማላ ኢሲፊቴላ ኢሰታሰ ዲዛኮኔ ዴማ ዴማ ሃሳያ ቆሞታን ቆንጨዳሰ። ዋሳ ኬል ኪርሰቶሳ አሳቴላ ገዲሺን ኪርሰቶሲ ቃሰ አሳቴላሰ ሁዔ ማላ። ዋሳ ኬላያ ገምቤ ኬላ ማላ ገዲሺን ኪርሰቶሲ ቃሰ ኬላሰ ዴንቁሼን ኡቲዛ ሹቻ ማላ። ዋሳ ኬላያ ማቺ ማላ ገዲሺን ኪርሰቶሲ ቃሰ አዚና ማላ። ፃፊዚ ኪርሰቶሳ ባጋራ ቆንጨዳ ፆሳ ኪያቴላ ኬሂ ጶቂሲ ዮቲዛ ዋዴ ጨማቴላ ዲዛ ቃላን ዮቴሰ። ኡባ ሚሼካ ኢዚ ፃሊዛይ ኪርሰቶሳ ሲቆን፣ ኢዛ ያርሼቴላን፣ ኢዛ ማርቴላን፣ ኢዛ ኪያቴላኒኔ ኢዛ ሳርቴላ ባጋራኮ!

ሃ ማፃፋይ ኦይኪዳ ኩሚላ ቆፋ
ጌሎሶ 1:1-2
ኪርሰቶሳኒ ዋሳ ኬል 1:3-3:21
ኪርሰቶሳን ገዲዳ ኦራላ ዴፆ 4:1-6:20
ኩሻ ቆፋ 6:1-24

1 ፆሳ ሼኔ ማላ ዩሱስ ኪርሰቶሳ ሃዋሪ ገዲዳ ጳውሎሳፔ። ዩሱስ ኪርሰቶሳን ዲዛ አማኔቲዛይታሰ ኤፌሶንን አማኒዛ አሳሰ።

* 2 ኑ አዋ ያሳፌኔ ጎዳ ዩሱስ ኪርስቶሳፔ ኪያቴሌኔ ሳሮቴሌ ኢንቴስ ገደ።

ኪርስቶሳፔ ቤተዛ ኣያና ኣንጅ

3 ኑ ጎዳ ዩሱስ ኪርስቶሳ ሳጋራ ሳሎን ኣያና ኣንጅ ኡባን ኑና ኣንጅዳ ጎዳ ዩሱስ ኪርስቶሳ ኣዋይ ያሲ ኣንጅቶ። 4 ኑ ኢዛ ሲንፋን ጌሺኔ ዋሶይ ባይንዳይታ ገዳና ማላ ቡሮ ኣላማይ ማዴታናፔ ካሴ ባ ሲቆን ኪርስቶሳ ሳጋራ ኑና ደሪዴስ። 5 ዩሱስ ኪርስቶሳ ሳጋራ ኑ ኢዛ ና ገዳና ማላ ባ ሎዎ ቆፋን ኮይሮ ወርሲ ዋሊዴስ። 6 ሄሲካ ባ ደሲዛዴ ሳጋራ ጮ ማላ ኑስ ኢማቲዳ ቦንቾ ኪያቴላይ ጋላቴታና ማላ።

7 ያሳ ኣጼ ኪያቴላ ዲሬቴላፌ ዴንደይሳን ዩሱሳ ሱፋን ዋዜቲዲ ናጋራፔ ኑ ማሬቲደስ። * 8 ኢዚ ባ ኪያቴላ፥ ሂላቴላኒኔ ኤራቴላ ኡባን ኑ ቦላ ከሂ ዳርሲዴስ። 9 ያሲ ቆፐዳ ፀራ ባ ቆፋ ኪርስቶሳ ሳጋራ ባ ሎዎ ቆፋ ማላ ኑና ኤሪሲዴስ። 10 ቡሮፔ ዎዴ ወርሴላን ሃናናስ ዲዛ ኢዛ ቆፋይ ሳሎ ቦላኒ ቢታ ቦላ ዲዛይታስ ኡባስ ሁዔ ገዲዳ ዩሱስ ኪርስቶሳፔ ወርሲ ጋርስ ኣፋናሳ። 11 ወርሲካ ባ ሺኔ ማላ ኦሊዛ ኢዛ ሺኔን ኮይሮካ ኢዚ ቆፐ ዋሊደይቲ ኑኒ ኢዛን ደሬቴደስ። 12 ኑኒ ካሴቲዲ ኪርስቶሳ ሳጋራ ኤካና ገዲ ኡፋይሳን ናገዛይቲ ያሳ ቦንቾ ጋላታን ቆንጨሳናሳ።

13 ኢንቴካ ቃሴ ቱማ ቃላ ሄሲካ ኢንቴና ኣሺዛ ሚሺራቾ ቃላ ሲይዲ ኪርስቶሳን ኣማኒዴታ። ኢዛ ኣማኒዲ ካሴ ኢማታና ጌቴቲዳ ዲሎ ኣያና ማታሚን ኣታሚቲዴታ። 14 ሄ ኣያናዚካ ኢዛ ቦንቾ ጋላታን ቆንጨሳና ማላ ያሲ ኤራይስ ገዲዳይታ ኡባታ ዎዛና ጋካናስ ኑ ላታስ ኦይሶ።

ጋላታኔ ዎሳ

15-16 ሄሳ ገሽ ኢንቴ ጎዳ ዩሱሳ ኣማኒዳ ገሺኔ ኣማኒዛ ኣሳ ኢንቴ ሲቁዘይሳ ታ ሲዮሳፔ ሃ ሲሚን ኢንቴና ቆፐ ቆፐ ኤካዳ ታኒ ታ ዎሳን ኢንቴ ገሽ ያሳስ ጋላታ ሺሾ ኣጋቤይኬ። 17 ቦንቾ ኣዋ ገዲዳ ኑ ጎዳ ዩሱስ ኪርስቶሳ ኣዋ ያሳ ኢንቴ ሎዔሌ ኤራና ማላ ቆንጨሲዛ ኣያናይኔ ኤራቴላ ኣያናይ ኢንቴስ ኢማታና ሎላ ታ ኢንቴስ ፓጩይ ባይንዳ ዎሳይስ። 18 ሄሳሶካ ኢንቴ ኢዛን ያይጌቲዳ ኡፋይሳይ ሄሲካ ኣማኒዛይታ ኣቻን ዲዛ ኢዛ ዲሬቴላይ ኣዛኮኔ ኢንቴ ኤራና ማላ ኢንቴ ዎዝና ኣይፌይ ፖሳና ማላ ዎሳይስ።

* 1:1 ሃዋ 18:19-21 * 1:7 ቆላ 1:14

19-20 ኑስ አማኒዛይታስ ኡባፌ ቦላ ጊዲዳ ኢዛ ዎልቃ ጾቃቴል ኢንቴ ኡራና ማላ ታ ዎሳይስ። ሄ ዎልቃይካ ኢዛ ጊታቴላ ሚኖቴላ ኦሶን ቤሲዲይሲ ሃይቆፔ ኪርሰቶሳ ዴንሲዲ ሳሎን ባ ኡሻቻን ኡቲሲዳ ኪርሰቶሳ ባጋራ። * 21 አይሲዛይታፔ፣ ጎዳቴላፔ፣ ዎልቃፌኔ ካዎቴላፌ ቃሴካ ሃዒ ፃላ ጊደንታ ቡርፔ ያና ዎዴካ ጊዲን ሱንል ኡባፌ ኢዚ ቦላ። 22 ያሲ ሃራ ዉርሲ ኢዛ ቶሆፔ ጋርሳን ሃሪሲዴስ። ዎሳ ኬላንካ ኡባ ቦላ ሁዔ ኦሊዴስ። * 23 ዎሳ ኬሊያ ኪርሰቶሳ ኣሳቴላ። ሄ ኢዛካ ኡባሶን ኡባ ሚሽ ኩንሊዛ ሄ ኢዛ ኩሜላ።

2

ኪርሰቶሲ ፓዒ ዴንዲዴስ

1 ኢንቴ ኢንቴ ቆሃዳ ቆሆ ጊሽኔ ኢንቴ ናጋራ ጋሶን ሃይቁዴይታ ሸን። 2 ሄሳ ኢንቴ ሃይሳ ኣላሜዛ ኢታ ኦጌ ካሊዴታ። ቦላ ጫርኮ ቦላ ዲዛ ዎልቃማ ሃሪዛይሳስ ሃዒካ ያሳስ ኣዛዜቶንታ ኣሳ ቦላ ኦሊዛ ኢታ ኣያናስ ኢንቴ ኣዛዜቲሼ ጋምዒዴታ። 3 ሃይሳፌ ካሴ ኩኒ ኑ ኣሾ ኣሞቴል ፖሊሼ ኣሾይ ኮዪዛ ኦጌ ካሊሼ ኢስታራ ደስ። ኩኒካ ሃንኮ ኣሳ ማላ ኑ ሜዴቴላፌ ያሳ ሃንቆ ጊደን ዴዎስ።

4-5 ጊደ ኣቲን ያሲ ኬሂ ሲቂዳ ጊሽ ባ ማርቴላ ዳርን ኩኒ ኑ ቆሆ ዳሪቴላን ሃይቁዴይታ ጊዲ ዲሺን ኪርሰቶሳ ባጋራ ኑና ኣሺዴስ። ኢንቴ ፓዒዳይ ኢዛ ኪያቴላና። 6 ያሲ ኑና ኪርሰቶሳራ ጋሊ ዴንሊዴስ። ዬሱስ ኪርሰቶሳ ባጋራ ኑና ሳሎን ባናራ ኡቲሲዴስ። 7 ሄሲካ ሃይሳፌ ጉዬ ያና ዎዴዛን ዬሱስ ኪርሰቶሲ ኑስ ባ ኪያቴላን ቆንጨሲዳ ዛዎይ ባይንዳ ባ ኪያቴላ ዲሬቴላ ኑና ቤሳናሳ። 8 ኢንቴ ያሳ ኪያቴላን ኣማኖን ኣቲዴታ። ሄሲካ ያሲ ኢንቴስ ሜላ ጮ ኣሚዳዛፔ ኣቲን ኢንቴ ኦሶፔ ጊዴና። 9 ኦኒካ ጩቁቶንታ ማላ ኦሶፔ ጊዴና። 10 ሄሲካ ያሲ ካሴ ኮይር ጊሊሲ ዎሊዳ ሎዎ ኦሶ ኩኒ ኦላና ማላ ዬሱስ ኪርሰቶሳ ባጋራ ኩኒ ናምዒንል ሜዴቴዳይታኔ ያሳ ሜዴቴላታ።

ኪርሰቶሳን ቤቲዳ ኢሲፌቴል

11 ሄሳ ጊሽ ኢንቴ ካሴ ኢንቴ ዬሌቴላን ኣይዛቤቲ ኢንቴ ኣሳቴላ ቦላ ኣሳ ኩሼ ኦሶ ጌደን “ኩ ቃፃራቲደስ” ጊዛ ኣሳቲ ኢንቴና “ቃፃራቶንታይታ” ጊዛይቶ! ኢንቴ ሄሳ ኣኔ ዎዝናን ዎሊቴ። 12 ኢንቴ ሄ ዎዴ ኪርሰቶሳፔ ሻኬቲዲ፣ ኢሰራዔሌ ናይታፔ ሃኪዲ፣ ጫቆ ቃላሲካ ኣላጋ ጊዲዲ፣ ሃይሳ ኣላሜዛ ቦላ

* 1:19-20 ማዛ 110:1 * 1:22 ማዛ 8:6

ሂደታይን ያሲ ባይንዳ ኢንቴ ካሴ ዲዛይሳ ዩቪ ቆፒቴ። 13 ሃሲ ቃሴ ኢንቴ ካሴ ሃሆን ዲዛይቲ ዩሱስ ኪርሰቶሳን ጊዲዲ ኢዛ ሱሳ ባጋራ ቪቁዴታ።

14 ናምዓታ ኢሲ ቦላ ጋሊዲ ጊደን ሻኪ ኦቪዛ ሚሻ ላሊዳ ኑ ሳርይ ኢዛ። 15 ዋጋ፣ ዋጋ ኣዛዞራ ጋሊ ኢሲፌ ባ ኣሾን ሻሪዴሰ። ሄሳ ኢዚ ኦሊዳ ጋሶይ ኢዛሰ ዋና ቆፋይ ናምዓታፔ ኢሲ ኦራሳ ኣሰ ባ ባጋራ ሜዲዲ ሳርቴላ ኤሃናሳ። 16 ኢዚ ማስቃሌ ቦላ ሃይቁዲ ሞርኬቴላ ዲጊዴሰ። ናምዓታካ ኢሲ ኣሾ ሂሰቲዲ ያሳራ ማቃዩንላዴሰ። * 17 ኢዚ ዩዲ ኢንቴና ሃኪ ዲዛይታሲኔ ማታን ዲዛይታሰ ጋሊ ሳርቴላ ሳባኪዴሰ። * 18 ኑ ወሪካ ኢዛ ባጋራ ኢሲ ኣያናን ኣዋ ኣቕ ሺቃና።

19 ሄሳ ገሽ ኢንቴ ኣማኒዛይታራ ኢሲፌ ኢሲ ዴሬ ኣሳኔ ያሳሰ ሶ ኣሳ ኣቲን ሃይሳፌ ጉዬ ቤቴታኔ ኢማላታ ጊዴኬታ። 20 ኢንቴ ሃዋሬታኔ ናቤታ ባሳን ኬፀቲዴታ፣ ኬላሰ ወርሱሳ ኩሻይ ዩሱስ ኪርሰቶሳ። 21 ኬላዚ ወሪካ ኢሲፌ ኦይኬቲዲ ጎደሰ ዲማ ኬሌ ጊዳናሰ ዲጩሰ። 22 ኢንቴንካ ያሲ ባ ኣያናን ዳናሰ ኢዛሰ ዲሳሶ ጊዳና ማላ ኢሲፌ ኬፀቲሾ ዴታ።

3

ኣይዛቤታሰ ሃዋሪ ጊዲዳ ጳውሎሳ

1 ሄሳ ጌደን ታ ጳውሎሲ ኢንቴሰ ኣማኖንታይታ ገሽ ዩሱስ ኪርሰቶሲ ቃቺዳዴ ጊዳዲሰ። 2 ታ ኢንቴና ጎዳና ማላ ያሲ ኪያቴላን ታሰ ኦሶሰ ኤፃ ኣሚዳይሳ ኢንቴ ቱማፔ ሲዩዴታ። 3 ሃይሳፌ ካሴ ታ ኢንቴሰ ቃንሳራ ፃፊዳ ማላ ታሰ ቆንጩን ታ ኤራናሰ ዳንዳዩዳ ፀራይ ሃይሳ። 4 ሄሳ ገሽ ኢንቴ ሄሳ ናባቢሼ ኪርሰቶሳ ፀራ ታ ኣይ ማላ ኤሪዳኮኔ ኢንቴካ ኤራናሰ ዳንዳዩታ። 5 ሄ ፀራይካ ሃሲ ኣማኒዛ ሃዋሪታሲኔ ናቤታሰ ቆንጩዳ ማላ ካሴ ቤኒ ኣዲዳ ዋዴ ዲዛ ኣሳታሰካ ቆንጩቤና። 6 ሄሲ ሄ ፀራይ ኣይዛቤቲ ሚሺራቾ ቃላ ባጋራ ኢሰራዴሌ ናይታራ ኢሲፌ ላቲዛይታ፣ ኢሲፌ ኢሳዴ ኣሳቴላ ማላ ጊዲዲ ዩሱስ ኪርሰቶሳ ባጋራ ቤቲዳ ሂደታ ኢሲፌ ገሽቲ ላቲዛይታ ጊዳናሳ።

7 ታካ ኢዛ ዋልቃ ኦሶ ማላ ታሰ ኣሜቴዳ ያሳ ኪያቴላ ኣሞታ ማላ ሃይሳ ሚሺራቾ ቃላ ኦሳንቻ ጊዳዲሰ። 8 ታ ቃሰ ሃንኮ ኣማኒዛ ኣሳፔ ላፋ ጊዲኮካ ኦኒካ ዛዋይ ባይንዳ ኪርሰቶሳ ዲሬቴላ ኣይዛቤታሰ ሳባካና ማላ ያሳ ኪያቴላን ሃይሲ ታሰ

* 2:16 ቆላ 1:20 * 2:17 ኢሳ 57:19

ኢሜቲዳስ። 9 ሄሳሎካ ወርሲካ ሜዲዳ ያሳን ቤኒ ዋዴ ቆቴቲ ዲዛ ያካሳስ ፀረ ቆፋይ ኣዛኮኔ ኡባስ ታ ቆንጨሳና ማላ ታስ ያሳ ኪያቴሌ ኢሜቲዳስ። 10 ኢዛ ቆፋይ ሃሲ ዋዴ ዋሳ ኬላ ባጋራ ዲማ ዲማ ሜዳይ ዲዛ ያሳ ሂላቴሌ ሳሎን ዲዛ ሃላቃታሲኔ ጎዳታስ ኤሬታና ማላ ሃኒዳስ።

11 ያሲ ኑ ጎዳ ዩሱስ ኪርሰቶሳ ባጋራ ሃይሳ ፖሊዳይ ሜርና ባ ቆፋ ማላ። 12 ኮኒ ኢዛይታ ጊዲዳ ጊሺኔ ኢዛን ኣማኒዳ ጊሽ ጌሻቴላራኔ ሂርጋይ ባይንዳ ኮኒ ያሳኮ ሸቃና ዳንዳዮስ። 13 ሄሳ ጊሽ ኢንቴ ቦንቴታና ማላ ታኒ ኢንቴ ጊሽ ታ ቦላ ጋኪዳ ዋዬዛን ኢንቴ ኡፋይስ ቃንያንታ ማላ ታ ኢንቴና ሃዳራ ጋይስ።

ኤፌሶን ኣማኒዛ ኣሳስ ዋሴቲዳ ዋሳ

14 ሄሳ ጊሽ ታኒ ያሳ ሲንላን ጉልባታይስ። 15 ሳሎን ዲዛይኔ ቢታ ቦላ ዲዛ ኢዛሶ ኣሳይ ወሪካ ኢዚ ሱንሌን ሱሜስ። 16 ኢንቴ ጋርሳ ባጋራ ሚናና ማላ ኣያና ባጋራ ኢዛ ቦንቾ ዱሬቴላይ ኢንቴስ ኢሜታና ማላ ታ ዋሳይስ። 17 ሄሲካ ኪርሰቶሲ ኢንቴ ዋዝናን ኣማኖን ዳና ማላኔ ቃሴካ ኢንቴ ኢዛን ዓጲዲ ሰቆን ሚናና ማላ። 18 ኪርሰቶሳ ሰቆስ ኣሆቴላይ፣ ኣዲሳቴላይ፣ ጵቃቴላይኔ ጨማቴላይ ኣይ ጊናኮ ኢንቴ ኣማኒዛ ኣሳ ኡባራ ኢሲፌ ሻኪ ኤራና ማላ። 19 ኢንቴ ያሳ ኩሜላራ ሻኪ ኤራዲ ኢዛን ኩሜላ ጊዳና ማላ ኣሳ ኤራፔ ቦላ ጊዲዳ ኪርሰቶሳ ሰቆ ኢንቴ ኤራና ማላ ታ ዋሳይስ። 20 ሄሳ ጊሽ ኑ ጊደን ኦሌዛ ባ ዋልቃ ጊና ኑ ዋሲዛይሳፌኔ ዋይኮ ኑ ቆፒዛይሳፌ ኡባፌ ቦላራ ኬሂ ዳርሲ ኦላናስ ዳንዳዩዛ ያሳስ። 21 ዋሳ ኬላን ቃሴካ ዩሱስ ኪርሰቶሳ ባጋራ ዋዴ ኡባን ሜርናፔ ሜርና ጋካናስ ኢዛስ ቦንቾይ ጊደ። ኣሚን።

4

ኪርሰቶሳ ባጋራ ቤቲዳ ኢሲፌቴላ

1 ሄሳ ጊሽ ጎዳ ሱንላን ቃሼቲዳ ታኒ ኢንቴ ያይጌቲዳ ያይሳስ ቤሲዛ ዱስ ዳና ማላ ኢንቴና ዋሳይስ። 2 ሙሌካ ኣሽኬታኔ ሹጎታ ጊዲቲ። ኢሶይ ኢሳራ ሰቆን ዲቴኔ ኢሶይ ኢሳ ዳንዳዩቲ። * 3 ሳርቴላ ኢሚዛ ኣያና ኢሲፌቴላ ናጋናስ ሚኒቲ። 4 ኢንቴ ያይጌቲዳ ጋላስ ኢሲ ሂደታኮ ያይጌቲዳ ማላ ኢሲ ኣሳቴሌኔ ኢሲ ኣያናይ ዳስ። 5 ኢሲ ጎዳይ፣ ኢሲ ኣማናይኔ ኢሲ ዊንቃታይ

* 4:2 ቆላ 3:12-13

ደስ። 6 ኡባፌ ቦላራ ገዲዳይ፣ ኡባ ቦላ ኦሊዛይ፣ ኡባሶን ዲዛይ፣ ኡባሰ ኦቆ ገዲዳ ኢሲ ያሲ ደስ።

7 ገዲኮካ ኪርሰቶሲ ኢማና ገ ቃቸዳ ማላ ኑስ ኢሳሰ ኢሳሰ ዲማ ዲማ ኢሞቴሉ ኢሚቲደስ። 8 ሄሳ ገሽ “ኢዚ ፑዴ ኬዚዳ ዎዴ ዲዎ ዲዒዳደስ፤ ኢሳሰ ኪያቴላ ኢሞታ ኢሚደስ”

ጌቲቲ ጌሻ ማፃፃን ፃፊቲደስ። * 9 ሂሰቲን “ኢዚ ፑዴ ኬዚዳ” ጉሲ ቃሴካ ዲጌ ቢታ ጋርሰ ዎዲደስ ጉሰ ገደንታ ኢገኮ ሄሲ ኣይ ጉሴ? 10 ኢዚ ዲጌ ጋርሴ ዎዲደይሲ ኩሚላ ኣላሚ ሚዴቴላ ኩማና ማላ ሳሎፔካ ቦላ ኬዚዳይ ኢዛ።

11 ኢሲ ኢሲ ኢሳቲ ሃዎሬታ፣ ባጋቲ ናቤታ፣ ሃራቲ ሚሺራቾ ቃላ ሳባክ፣ ባጋይቲ ቃሴ ሄሚዛይታኔ ታማርሲዛይታ ገደና ማላ ኢዚ ኢሞታ ኢሚደስ። 12 ሄሲካ ኪርሰቶሳ ኢሳቴላ ገዲዳ ዎሳ ኬሊያ ኬጃታና ማላ ኢማኒዛይታ ኢማኖ ኦሶስ ገገሳናሳ። 13 ሄሲካ ሃናናይ ኑ ዉሪካ ያሳ ና ኢማኖኒኔ ኢዛ ኤርን ቤቲዛ ኢሲፊቴላኮ ጋኪዲ ኩሚላ ኢሰ ገደናሰ ኪርሰቶሳን ኑኒ ኪርሰቶሳላ ኩሚላኔ ፖሎ ገደና ማላ።

14 ሄሳ ገሽ ኢሳ ቦላ ዳንዲዛ ጎቲ ጫርኮይ ሄኔ ሃ ሾጮቹዛ ማላ ዲማ ዲማ ቲሚርቲ ጫርኮን ኢሳ ጌኔኒኔ ባሌላን ኣኔ ኑኒ ሄኔ ሃ ጳንቄቲሼ ቄሪ ጉላ ናይታ ማላ ሃናኮ። 15 ሄሳሶ ሃና ኢገዲ ቱማ ሲቆን ሃሳዪሼ ሁዔ ገዲዳይሳኮ ሃኒዛዛን ኡባን ኣኔ ዲጮስ። ሄ ሁዔዚካ ኪርሰቶሳ። 16 ኢዛ ጌደን ኢሳቴላ ዉሪ ፃጸን ኦይኬቲዲ ኢሲ ኢሲ ኢሳቴላ ባ ኦሶ ኦሊሼ ዉሪካ ሲቆን ዲጮሴኒኔ ባናካ ሚንሌስ። *

ፖ ያይታ ማላ ዲስ

17 ኣይዛቤታ ማላ ጮ ሚላ ቆፋን ሚላ ሲሚሬታናሰ ኢንቲሰ ቤሴና ጋዳ ታ ኢንቲና ዘራይስ። 18 ኢሰታ ዎዝናይ ሙሚዳ ገሺኔ ዩሺ ቆፖንታ ገሽ ኢሰታ ዎዝና ኣይፊይ ቆቂደስ። ኢሰቲ ያሳ ዳዎፔ ሻኬቲዳ። 19 ኢሰታ ዎዝናይ ዶጪዳ ገሽ ካሎይ ባይንዳ ባ ኮይዳ ማላ ባና ካልሶንታ ኢሞኒኔ ቱናቴላን ዳናሰ ዎጋይ ባይንዳ ኢታ ኦሶስ ባና ኣሉ ኢሚዳ።

20 ኢንቲ ቃሴ ኪርሰቶሳ ሄሳ ማላን ኤሪቤይኬታ። 21 ኤ ቱሙካ ኢንቲ ኢዛ ገሽ ሲዩዳታኔ ዩሱሳን ዲዛ ቱማ ኢዛፔ ታማሪዳታ። 22 ኢንቲ ካሴ ዲዛ ዲሳይ ባሌሊዛ ኢሞን ቂታቲዳ ገሽ ካሴ ጩጋ ኢሳቴላ ኢንቲፊ ቃሪ ዩጋና ማላ ታማሪዳታ።

* 4:8 ማዛ 68:18 * 4:16 ቆላ 2:19

* 23 ቃሴካ ኢንቴ ቆፋይ ኣገናን ኦራዎ። 24 ቱሙ ዒሎቴላኒኔ ጌሻቴላን ያሴ ሚሳታና ሜዴቴዳ ኦራላ ኣሳቴላ ማይዒቴ። *

25 ኑ ዉሪካ ኢሲ ኣሾ ጊዲዳ ጊሽ ዋርዶቴላ ዲጊዲ ኮኒ ኑ ጋርሳን ኢሶይ ኢሳራ ኣኔ ቱማ ሃሳዮሰ። * 26 ሃንቁቴቴ ሺን ናጋራ ኦሎፍቴ፤ ኢንቴ ሃንቆን ዲሺን ኣዋ ኣርሼይ ዉሎፎ። * 27 ፃላዔሰ ሶሆ ኢሞፍቴ። 28 ካሴ ካይሶቴዛዴይ ሃይሳፌ ጉዬ ካይሶቶፓ። ጊዶ ኣቴን ሜቶቴዲ ኢዛ ዋሲዛይታሰ ኢሚዛ ሚሽ ኢዛ ኩሼን ዳና ማላ ሎዎ ሚሽ ባ ኩሼራ ኦላ ዴማናሰ ዳቡር።

29 ኮሺዛ ማላ ሃንኮ ሰዪዛይታ ጎሲዛዚኔ ማዲዛ ቃላፔ ኣቴን ጎይይ ባይንዳ ቃላይ ኢንቴ ዲናፔ ኬዘፖ። 30 ኢንቴ ኣታና ጋላሳሰ ኣታሜቴዳ ያሳ ዒሎ ኣገና ሚሺሶፒቴ። 31 ጫሞ ዮዎ ዉርሲ ሃንቆካ፣ ዪሎ፣ ኦሽ፣ ጫሼ፣ ቃሴካ ሃንኮ ሃራ ኢታቴላ ዉርሲ ኢንቴፌ ዲጊቴ። 32 ኢንቴና ያሴ ኪርሰቶሳ ባጋራ ኣቶ ጊዳ ማላ ኢንቴካ ኢንቴ ጋርሳን ኣቶ ኣቶ ጌቴቴቴ፤ ኢሶይ ኢሳራ ኪያታኔ ኢሶይ ኢሳሰ ቃዴቴዛይታ ጊዲቴ። *

5

1 ሄሳ ጊሽ ኢንቴ ዶሴቴዛ ናይታ ማላ ያሴ ሚሳቴቴ።
2 ኪርሰቶሲ ኦና ሰቁዳ ማላ ቃሴካ ኑ ጊሽ ባና ሳዊዛ ያርሾ ኦላ ያሳሰ ኢሚዳ ማላ ኢንቴካ ሲቆን ሰሜሬቴቴ። *

3 ላይማይ ዋይኮ ቱናቴላ ዋይኮ ኡዜቴላ ሙሉካ ኢንቴ ጊዶን ቤቶይ ኣቴን ዘጊርሲካ ሰዬቶፎ። ሄሳ ማላይ ጌሻ ያሳ ኣሳሰ ቤሴና። 4 ኢንቴ ጋላታ ጋላቴዛይታ ጊዲቴ ኣቴን ኣሴ ዬላቺዛ ላፋ ሃሳያይ ጮ ኤያቴላ ዮዶይ ኢንቴሰ ቤሶንታ ጊሽ ሄሳ ማላይ ኢንቴ ጋርሳን ዶፖ። 5 ቃሴካ ኢንቴ ላይማቴዛይታሰ ዋይኮ ቱናታሰ ዋይኮ ኡዜቴዛይታሲኔ ኤቃሰ ጎይኒዛይታሰ ኪርሰቶሳ ካዋቴላኒኔ ያሳ ካዋቴላን ኢሰታሰ ላታሶይ ባይንዳይሳ ኢንቴ ኤሪቴ።

6 ኢንቴና ኦኒካ ዋርዶ ሃሳዮን ባሌሎፎ። ጋሶይካ ያሳ ሃንቆይ ኢዛሰ ኣዛዜቶንታ ናይታ ቦላ ያናይ ሃይታንታ ማላና። 7 ሄሳ ጊሽ ሄሳንታ ማላራ ዙፔቶፒቴ። 8 ካሴ ኢንቴ ቆማ ሺን ጎዳን ሃዒ ኢንቴ ፖዎ። ኢንቴ ፖዎ ናይታ ማላ ዲቴ። 9 ፖዎሰ ኣይፊይ ሎዔቴላን፣ ዒሎቴላኒኔ ቱማቴላን ኡባን ዴሰ።

* 4:22 ቆላ 3:9 * 4:24 ቆላ 3:10 * 4:25 ዛካ 8:16 * 4:26 ማዛ 4:4 * 4:32 ቆላ 3:13 * 5:2 ኬሳ 29:18፤ ማዛ 40:6

10 ሃሳቱን ጎዳ ኡፋይሲዛ ሚሽ ኮዩቴ። 11 አይፌይ ባይንዳ ጳጳማ ኦሶራ ኢንቴስ አይኮ ጋጎቴሌ ዶፖ። ሃሳፌ ኢታ ኦሶ ቆንጮ ኬሲቴ። 12 ጳጳማን ዲዛ አሳቲ ጌማን ኦሌዛ ሚሻ ጊሽ ሃሳያይካ ዩላቸሰ። 13 ፖያይ ፖሲዳዚ ወሪ ቆንጮን ቤቴሰ። 14 ጋሶይካ ወርሲ ቤሲዛይ ፖያ። ሃሳ ጊሽ “ኔኖ፣ ጳስኪዛይሶ ቤጋ! ሃይቆፔ ዴንዳ፣ ኪርሰቶሲ ኔስ ፖሲሳና” ጌቴቴዳስ።

15 ሃሳ ጊሽ ኤራቴሌ ባይንዳይታ ማላ ጊዶንታ ኢንቴ ዋኒዲ ኤራታ ማላ ዳናኮኔ ናጌቴቴ። 16 ሃይሲ ዋዴዚ ኢታ ጊዲዳ ጊሽ ሃሳ ሎዔሌ ኤሪቴ። * 17 ሃሳ ጊሽ ኤያታ ጊዶፒቴ፤ ጎዳ ሸኔይ አዛኮኔ ዩሽ ቆፒቴ።

18 አያናይ ኩሚዳይታ ጊዲቴ ኦቲን ማሶሲዛ ኡሻን ማሶቶፍቴ። ሃሲ ሚላ ሚሻ ላሌላ። 19 አያና ዩላን ጋላታራ ጋሌ ዩዲሼ ኢንቴ ጊዶን ኢሶይ ኢሳራ ሃሳዬቴቴ። ኢንቴ ሳባኒኔ ዩላን ኩሚላ ዋዝናፔ ጎዳ ጋላቴቴ። 20 ሃሳን ያሳ አዋ፣ ጎዳ ዩሶሶ ኪርሰቶሳ ሱንላ ኡባ ሚሻሰ ኡባ ዋዴ ጋላቴቴ።

ማቾኔ አዚና

21 ኢንቴ ኪርሰቶሳ ቦንቾሰ ጊዲ ያሻራ ኢሶይ አሳሰ አዛዜቴቴ።

22 ማቾቶ ኢንቴ ጎዳስ ሃሬቴዛ ማላ ኢንቴ አዚናታሰ ሃሬቴቴ።

* 23 ኪርሰቶሲ ባ አሾ ጊዲዳ ዋሳ ኬላይሰ ሁዔ ጊዲዳ ማላ አዚናይካ ባ ማቼይሲ ሁዔ። 24 ሃሳ ጊሽ ዋሳ ኬሌያ ኪርሰቶሳሰ አዛዜቴዛ ማላ ማቼቴካ ባ አዚናታሰ አይ ሃናንካ አዛዜታናሰ ቤሴሰ።

25 አዚናቶ! ኪርሰቶሲ ዋሳ ኬላዮ ሲቂዳ ማላኔ ባና ኢዚ ጊሽ አሌ ኢሚዳ ማላ ኢንቴካ ኢንቴ ማቼታ ሲቂቴ። * 26 ባ ቃላ ባጋራ ሃላን ሚጫ ጌሺዲ ኤራይሰ ዲማሲዳ ማላ። 27 ሃሳሶካ ቂታይ ዋይኮ አይፌሶ ዊርጶቴሌ ዋይኮ ኢሲ ኢታይ ኢዚ ቦላ ቤቶንታ ጌሺኔ ባላይ ኢዚ ቦላ ባይንዳር ቦንቾ ዋሳ ኬሌ ሂሰቴዲ ኤራይሰ ሺሻናሳ። 28 አዚናቴካ ሃሳሶ ባ ማቼታ ባ አሾ ማላ ሲቃናሰ ቤሴሰ። ባ ማቾ ሲቂዛዴይ ባና ሲቂሰ። 29 ባርካ ባና ኢዊዛዴይ ኦኒካ ባዋ። ባ አሾሰ ሚሴኔ ባና ናጌሰ። ኪርሰቶሲካ ዋሳ ኬላሰ ሂኒሶ ኦሌዴሰ። 30 ኦኒ ኪርሰቶሳ አሳቴላ። 31 ሃሳ ጊሽ “አሲ አዮኔ አዋ አጊዲ ባ ማቼይራ ኢሲኖ ጊዴሰ፤ ናምዓይካ ኢሲ

* 5:16 ቆላ 4:5 * 5:22 ቆላ 3:18፤ 1ጴፀ 3:1 * 5:25 ቆላ 3:19፤ 1ጴፀ 3:7

አሾ ገዳቴሰ” ጌቴቴ ጌሻ ማፃፋን ፃፈቲዳሰ። * 32 ሃይሲ ዳር ፀራ ዮፆ፣ ታካ ሃይሳ ኪርሰቶሳ ጊሺኔ ዋሳ ኬፋ ጊሽ ዮታይሰ። 33 ገዲኮካ አንቴሬ ኢሲ ኢሳዳይ ባ ማቾ ባና ሲቁዛ ማላ ሲቆ፤ ማቻካ ባ አዚና ቦንቹ።

6

ዩሊዳይታኔ ናይታ

1 ናይቶ! አንቴ አንቴና ዩሊዳይታሰ ጎዳን አዛዘቲቴ። ሄሲ አንቴሰ ቤሴሰ። * 2 “ኔ አዋኔ ኔ አዪዮ ቦንቻ” ጊዛ አዛዘ ገደን ዲዛ ሂዳታይ ኮይሮ አዛዘ። 3 ኔ ሄሳፉ ኦሊኮ ኔሰ ሎፃናኔ ኔሰ ላይላይ ቢታ ቦላ አዲቃና። 4 ዩሊዳይቶ! አንቴካ አንቴ ናይታ ሃንቁሶፍቴ፤ ገደ አቲን አንቴ ናይታ ጎዳ ዘሬኒኔ ሴራን ዲቺቴ። *

ኦሊሲዛይታኔ ኦሊዛይታ

5 ኦሳንቻቶ አንቴ ኪርሰቶሳሰ አዛዘቲዛ ማላ ቢታ ቦላ አንቴና ኦሊሲዛይታሰ ያሻቴላኒኔ ቦንቻን ሱሬ ዋዝናፔ አዛዘቲቴ። 6 ጮ አሳ አይፊን ቤታና ማላኔ ኦሊሲዛይታፔ ዱና አንጆ ኤካናሰ ገደንታ አንቴ ኪርሰቶሳ አይሌታ ማላ ያሳ ሸኔ ኩሜላ ዋዝናፔ ፖላና ማላ ዋዝናፔ አዛዘቲቴ። 7 አሳሰ ኦሊዛ ማላ ገደንታ ጎዳሰ ኦሊዛ ማላ አንቴ ኩሜላ ዋዝናፔ ኦሊቴ። 8 ጋሶይካ አይሌ ገደን ዋይኮ ጎዳ ገደን ባ ኦሊዛ ሎፆ ኦሶሰ ኡባሰ ዋይቶ ኤካናይሳ አንቴ ኤሬታ።

9 አንቴኖ ጎዳቶ! አንቴካ አንቴ ኦሊሲዛይታሰ ሄሳፉ ኦሊቴ። ኢሰታሰኔ አንቴሰ ጎዳ ገዲዳይ ቦላ ሳሎን ዲዛይሳ፤ ኢዚካ አሰ አይፊሶ ጻሊ ማደንታይሳካ አንቴካ ኤሬዛ ጊሽ ኦሳንቻታ ባቢሶ አገዲ ሎፆ ኦሊቴ። *

ያሳፌ ቤቲዛ ኦላ ሚሽ

10 ሃራ ባጋራ ሚኖ ጎዳኒኔ ኢዛ ገታ ዋልቃን ሚኒቴ። 11 ዳቡሎሳ ጌኔ ኦሶ አንቴ ኤቁታናሰ ዳንዳያና ማላ ያሳ ኦላ ማይፆታ ማይቴ። 12 ጋሶይካ ኑ ኦሌታናይ አሾራኔ ሱላራ ገደንታ ሃይሳ ቆማ አላሜዛ ሃሪዛ ጎዳታራኔ ዋልቃማታራ ቃሴካ ሳሎ ቦላ ዲዛ ቱና አያና ኦላንቻታራ ኦሌቶሰ። 13 ኢታ ጋላሳይ

* 5:31 ሜሬ 2:24 * 6:1 ቆላ 3:20 * 6:4 ቆላ 3:21 * 6:9 ቆላ 4:1፤ ዛሬ 10:17፤ ቆላ 3:25

ጋኪሽን ኢንቴ ሞርኬ ዋልቃራ ኤቁታናስ ዳንዳያና ማላ ያሳ ኦላ ማይዖታ ኩሜል ማይዒቲ። ኢንቴ ኡባካ ፖሊዲፔ ጉዬ ማኒ ኤቃናስ ዳንዳዬታ።

14 ሄሳ ጊሽ ኢንቴ ፃሳን ቱማ ዚናሬ ማላ ዳንጨቲዲ ዒሎቴሳ ፀሩሬታ ማላ ቲራን ማይዒዲ። ** 15 ሳርቴሳ ሚሺራቾ ቃላ ቶሆን ጨማ ማላ ኦሊዲ ጊጌቲ ኤቁቴ። * 16 ሄይታንታፊካ ቦላራ ታማ ማላ ፖፖልዑ ጊዛ ኢታ ኦያና ዋንዳፊታ ኢንቴ ወርሲ ቶይሳና ዳንዳያና ማላ ኦማኖ ጎንዳሌ ማላ ዳንሲቴ። 17 ኦቶቴል ቢራታ ቆቤ ማላ ሁዔን ዋሊቴ። ኦያና ጊሳ ማሻ ኦይኪቴ፤ ሄሲካ ያሳ ቃላ። *

18 ዋሳን ኦይ ሃኖንካ ኦያናን ዋሲቴ። ሄሳ ቆፒዲ ቤጌቴ፤ ኦማኒዛይታ ኡባ ጊሽ ቃንዖንታ ዋኦሲቴ። 19 ታኒ ሚሺራቾ ቃላ ፀራ ኦሳስ ቆንጨሳናስ ዲና ዶዩዛ ኡባ ዋዴ ያሺ ባይንዳ ታ ያላቴላን ዮታና ቃላይ ታስ ኢሜታና ማላ ታስ ዋሲቴ። 20 ታኒ ሚሺራቾ ቃላ ጊሽ ሳንሳላታን ቃሺታዳ ኪቴቲዳዴ ጊዲዳይ ሄሳሳ። ሄሳ ጊሽ ታ ዮታናስ ቤሲዛይሳ ባቦንታ ዮታና ማላ ታስ ዋሲቴ።

ወርሴሳ ሳርካ

21 ታ ኦይ ማላ ዲዛኮኔ ኦይ ኦሊዛኮ ኢንቴ ኤራና ማላ ደሴቲዳ ታ ኢሻይ ጎዳስ ኦማኔቲዳ ኦሳንቻይ ቲቁቆሲ ኢንቴስ ሃኒዳይሳ ወርሲካ ኢንቴስ ዮታና። * 22 ኢንቴ ኑ ሃኖቴል ኤራና ማላኔ ኢንቴ ዋዝና ኢዚ ሚንሌላና ማላ ታ ኢዛ ኢንቴኮ ዬዳዲስ። *

23 ኦዋ ያሳፊ፥ ጎዳ ዬሱስ ኪርስቶሳፔ ሳርቴሊኔ ሲቆይ ኦማኖራ ኢንቴስ ታ ኢሻታስ ጊዶ። 24 ጎዳ ዬሱስ ኪርስቶሳ ፓጩይ ባይንዳ ሲቁዛ ኡባስ ሳርቴሊ ጊዶ። ኦሚን።

* 6:14 ፀሩሬ ጉሲ ቤኒ ዋዴ ኦላ ኦሳቲ ቲራን ማይዒዛ ኦላ ማይዖ። * 6:14
ኦሳ 11:5፤ 59:17 * 6:15 ኦሳ 52:7 * 6:17 ኦሳ 59:17 * 6:21
ሃዋ 20:4፤ 2፻፶ 4:12 * 6:22 ቆላ 4:7-8

ኦሪሳ ጩቆ ማግኔ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 11 Nov 2022 from source
files dated 29 Jan 2022
dffa0cbb-5f77-5875-bf95-f4176677af45